

Rumah kerap dilanda banjir

Penduduk runsing peralatan sering rosak

SUNGAI PANJANG – Beberapa penghuni rumah di Jalan Loji Lama Parit 15 cemas apabila paras air yang melimpah ke kediaman mereka naik secara tiba-tiba menyebabkan beberapa peralatan kelengkapan rumah rosak akibat tidak sempat diselamatkan.

Banjir dipercayai berpunca daripada kejadian berpunca keling di Sungai Bernam berhampiran kawasan kediaman itu yang berlaku sejak petang semalam.

Sinar Harian difahamkan, sebanyak tujuh rumah telah dimasuki air termasuk rumah seorang warga emas yang mengalami strok.

Meskipun mengalami strok sebelah badan, Abdul Ghani Sulaiman, 67, tetap rajin membantu anaknya mengeluarkan air yang memasuki kediaman mereka sejak Rabu lalu.

Anaknya, Martina, 25, berkata, lantai rumahnya dibina agak rendah berbanding kawasan luar membuatkan mereka terpaksa mencedok limpahan air yang membanjiri kawasan dalam rumah.

“Sejak air masuk Rabu lalu, beginilah rutin kami setiap hari, pada mulanya air hampir kering, tetapi pagi tadi (semalam) tiba-tiba air naik semula sehingga paras lutut, ayah walaupun sakit tetap rajin membantu dengan menggunakan sebelah tangannya yang masih boleh digerak-



■ Abdul Ghani bersama anaknya, Zura berusaha mencedok air keluar bagi memastikan lantai rumah kembali kering.

kan,” katanya.

Menurutnya, penat mencedok air keluar, ada ketikanya dia hanya membiarkan air berkenaan mengalir keluar sendiri melalui lubang-lubang kecil yang ditebuk di bahagian bawah dinding rumahnya.

Seorang penduduk, Mohamed Yusof Saman, 63, berkata, keadaan rumah dimasuki air sudah biasa dialami mereka terutama pada musim hujan berpanjangan, malah pada Aidilfitri yang lalu, beberapa kediaman turut dinaiki air sehingga paras buku lali.

Menurutnya, air hanya disedari naik jam 6.30 pagi semalam menyebabkan peralatan seperti televisyen, mesin basuh dan peti ais tidak sempat diselamatkan.

“Kebanyakan mereka yang tinggal di sini adalah peneroka kawasan ini dan sistem perparitan yang ada dibuat sendiri oleh penduduk kampung.

“Jadi, kejadian rumah dimasuki air ini sudah menjadi kebiasaan buat kami penduduk di Jalan Loji Lama Parit 15,” katanya.